

Lětsa po 175 lětami založenja Maćicy Serbskeje a po 32 lětach znowazaloženja mam tu jako 16. předsyda na štyri lět - po přeću skrótka někotre słowa, mysle podać.

Je zajimawe po jenož dvěmaj lětomaj předsydstwa sej protokole přečitać a njeje lóchko to najbytosniše wupytać, chcu to spytać a činju po heslach.

**Wopominali** smy wusahowace podawki, kaž „**500 lět reformacija**“ 2017. Nimo wopomjenskich zarjadowanjow je na iniciatiwu Serbskeho superintendenta Jana Malinka na w. wušla kniha „Pjeć lětstotkow – Serbja a reformacija“ do kotrejež su tež dalše člonoyo přinošowali. Knihu mjenowach z prawom wusahowacy podawk lěta.

W zwisku reformacije a po přednošku čłona dr. Jensa Buliša wo spomóžnym skutkowanju japoštołskeho administratora Jana Leisentritta je naše předsydstwo napisało Wyšemu měšćanostej Alexandrej Ahrensej próstwu wo pomjenowanje drohi, naměsta, šule abo pod. po sławnym Janu Leisenttricie.

Wotmołwu smy dóstali z informaciju, zo je list dóšoł. Nětkle po pjeć lětach wočaknjemy wólby zo móhli noweho měšćanostu na našu próstwu skedźbnić.

Wopominali smy **50. posmjertniny Michała Nawku** (27.6.2018) a to tohodla naspomnju, dokelž běše to šulerski projekt zhromadnje ze šulerjemi a wučerjemi SWŠ Radwor. 35 šulerjow je so ze žiwjenjom a skutkowanjom wótčinca zaběrało.

Na **Jana Rawpowe 90. posmjertne narodniny** smy z koncertom na žurli Serbskeho muzeja z najwšelakorišimi jeho kompozicijemi spominali. Poradženy koncert wuhotowali njejsu Maćicarjo, ale nimo profesionalnych wumělcow, wosebje młodostni z hudźbneje šule.

Chcu prajić, zo je stara Maćica zamólha šulerske projekty organizować a přewjesć, šulerjow a młodžinu do serbskeho džěła zapřijeć.

Wosyročeny polo w serbskim žiwjenju zda so być **přirodowěda** a runje tu mamy wuznamnych přirodospytnikow zańdženosće. Maćicarjo, kotřiž słušeja k založerjam přirodowědnym stawiznam Sakskeje a za hranicami. Tak smy z wopomnjensкими zarjadowanjemi na wosobiny Korlu Šěcu w Rachlowje, na Michała Rostoka w Husce a na Jana Bohuwěra Mućinka w Zemicy-Dumicach spominali a – z partnerami – jich počesćili. Z wotpohladom sym městnosće jich skutkowanja naspomnił, dokelž su wokoliny džensa nimale přeněmčene. A runje tohodla smy na to dźiwali, zo tamniše wobydlerjo zapřijamy, zo bychu wo wuznamje svojich, našich prjedownikach wědzeli.

**Zhromadne džěło** z Domowinu.

Nastupajo zhromadne džěło – Maćica Serbska je na swojej hłownje zhromadźiznje 11.3.2017 zabrała stejišćo „Serbski dom w Budyšinje ma kulturne a politiske srjedzišćo wostać“. Tole stejišćo sym zhromadnje ze župu Arnošt Smoler Budyšin tež na 25.3.2019 hłownej zhromadźiznje Domowiny zabrali – hl. protokol XIV diskusija k programej dypk 12. K aktualnemu stawej Serbskeho doma je mi předsyda Dawid Statnik swoje měnjenje z e-mailu wčera podał.

Kak dale z wjesnymi muzejemi dwurěčneje Łužicy sym so – počahujo na dawne prócowanja Zwjazka serbskich wumělcow – na hłownej zhromadźiznje Domowiny 2019 – tež w mjenje župy Jan Arnošt Smoler - wuprajit. Wone měli so do zamołwitosće třěšneho zwjazka přiwzać a cyłkowny nawod měli wěcywustojni ludžo, fachowcy přewzać. To je so do směrnícow Domowiny 2019 dypk 5.2.6. a jara wostabjene do směrnícow 2021 zapisało.

Džensniši staw nastupajo přichod wjesnych muzejow w dwurěčneje Łužicy njeje spokojace. \*

Zhromadne džělo ze Serbskim ewangelskim towarstwom, z Towarstwom Cyrilom a Methodom, Spěchowanskim towarstwom Smolerjec kniharnje, Sokołom a dalšimi towarstwami a skupinami běše data a dobra a budže dale dobra a wunošna.

Zhromadne džělo z **Budyšinom** je po potrebjce dobre, ale njeje přeco lochko so dorozumić. 2019 wobdžělichmy so na diskusiji „Wobraz přichod města 2030+“, podachmy ideje. A wobdžělili smy so na přenjeji diskusiji, tež hdyž je podate hesło wuradźowanja „Serbja, žonop „Silbermond“ – nas wjac hač zadžiwało.

Před něšto lětami je město Budyšin namjetowało informacisku brošuru, kotraž měješe *Von den Sauriern zu den Sorben* rěkać...

Při wšěm smy docpěli, zo je na žurli Budyskeje radnicy nimo łačonskeho napisma wyše duri tež serbske hesło „Knježe spožč rozrost“. Dobra to próstwa wosebje na tutym městnje.

**Maćica a wukraj** Naspomnić dyrbju na kóždy pad pozitiwny zjaw zhromadneho džěla dohromady 15 Maćicow. Dotal přewjedzechu so 4 kongresy na kotrychž běchmy wobdžěleni. Na poslednim zeńdženju pola Maticy Słowakskej w Martinje namjetowachmy t. mj. Galeriju wuznamnych słowjanskich wosobinow zestajeć. Započatk je so činił, štyrjo Serbja su tam wozjewjene – J. A. Smoler, M. Hórnik, A. Muka a M. Völkela. Přehlad je tež w interneće přistupne.

Składnostnje 70. róčnicy załoženja **Serbskeho gymnazija w Libercu** a wot Domowiny organizowanym swjedženskim zarjadowanju běchmy wězo wobdžěleni, wšako słuša wěsty džěl našich člonow su prjedawši šulerjo.

Sorabistiski seminar na uniwersiće we Lwiwje je so 2017 posledni přewjedł, běše to dotal 15. seminar, na kotrymž so tež Maćicarjo wobdžělchu.

Společnost přátel Lužice a Serbski seminar w Praze chcu jenož naspomnić, dokelž kóždy wě, zo mamy stajny kontakt k tam skutkowacym towarstwom, předsydstwu a člonam. Zo so mjez sobu podpěrjeme a lěta hižo zhromadne konferency w Praze zarjadujemy a zběrniki konferencow wudamy. Na tutym městnje słuša doholětnemu **předsydzje** a čłonej našeje Maćicy, prof. dr. Pětrej Kaleće wutrobny džak.

K statistisce słuša tež, zo mamy tež člonow we wukraju, w Praze a Opolu, ale tež Słowjenskej, Finskej a Japanskej, kotřiž nas podpěrjete. To nas wjeseli a za to smy jim džakowni.

A nic na kóncu chcu naspomnić, zo smy so wo moderne **nowe wobličo Maćicy** postarali, zo mamy dwubarbne logo, nowe wopisma a printowe wudžěłki, džakowano wutrajnemu prócowanju Marki Cyžoweje.

Čestny nadawk, **zawostajenstwo monsignora Měrcina Salowskeho** w jeho zmysle wužiwać, so nam dotal bohužel poradził njeje. Wotpohlad, pjenjezy młodemu Serbej za džělo z nabožnym charakterom přewostajić, so na kóncu njeje spjelnił. Naležnosć měła so bórže rozrisać.

Po třo předsydach sym znowazaloženemu MS najkrótsi čas nawjedował, wotpowědnje tomu, mój přinošk zakóncu.

**Předsydce** Ani Pohončowej – 17. předsydce Maćicy Serbskeje wšo to najlěpše – wutrajnosć, wjeselo a wuspěch!

A připódlá prajene, wona je mjez předsydkami Maćicow ta třěća žona, předsydka Maćicow – po předsydki Čěskeje a Šleskeje.

**Džakuju** so wšitkim wosebje člonkam z bywšeho předsydstwa Maćicy - Jěwje-Marij Čornakec a Marce Cyžowej - za zajimawy rjany zhromadny čas a za dobre wuspěšne džěło. Nowemu předsydstwu přeju z wutroby spomóžny a wuspěšny nawod našeje Maćicy Serbskeje. Gratuluju Maćicy Serbskej a nam k sławnemu jubilejej.

Jurij Łušćanski